

इवनिंग डोगरी न्यूज़ बुलेटिन

समे 18:15 Hrs

Headlines

- समाज कल्याण मंत्री स्कीना इतू होरें बुजुर्गे ते दिव्यांग लोकें दे फायदें लेई प्रक्रियाएं गी सौक्खा बनाने ते इनें लोकें दे मुआफक हीलें अपनाने दी जरूरतें पर जोर पाया। मंत्री होरें जम्मू ते श्रीनगर आले समग्र क्षेत्रीय केन्द्रें यानि CRC दी कारकदर्गी दा जायजा लैता।
- मंत्री सतीश शर्मा होरें छम्ब हलके दे 62 उन्नत करसानें गी तिलहन गी बढ़ावा देने सरबन्धी योजना दे तैहत कृषि विज्ञान केन्द्र आर.एस.पुरा जम्मू दे इक ध्याड़े दे दौरे पर रवाना कीता।
- त्योहारी रूत दे दौरान यात्रुएं दी बढ़धी मंग गी पूरा करने दे मकसद कन्नै उत्तर रेलवे नै श्री माता वैष्णो देवी कटड़ा ते बनिहाल बश्कार विशेष ट्रेन दियें सेवाएं दा होर चंऊ दिनें लेई विस्तार कीता ऐ।
- प्रधानमंत्री नरेन्द्र मोदी हुंदा महावार रेडियो कार्यक्रम “मन की बात” अज्ज अपने 11 बरे पूरे करी गया ऐ ते अजें बी एहू प्रधानमंत्री ते देशवासियें बश्कार लगातार इक महत्वपूर्ण सम्पर्क दी भूमिका निभा करदा ऐ।
- कश्मीर दियें उच्चियें धारें पर इस रूत दी पैहली बर्फबारी होई ऐ। मौसम विभाग नै औने आले किश दिनें दौरान पच्छमी ब्हाएं च खौदल करी भारी बरखें ते बर्फबारी दे असार जताए न।



Itoo CRC

समाज कल्याण विभाग दियें मंत्री स्कीना इत्तू होरें बुजुर्ग नागरिकें ते दिव्यांग लोकें दे फायदे लेई प्रक्रियाएं गी सौख्वा बनाने ते इनें लोकें दे मुआफक हीलें अपनाने दी जरूरतै पर जोर पाया ऐ। मंत्री होरें ए गल्ल जम्मू ते श्रीनगर आले समग्र क्षेत्रीय केन्द्र यानि CRC दे कम्मकाज दा जायजा लैने आस्तै लाई गेदी इक बैठका दौरान आखी। इस मौके पर मंत्री होरें इनें केन्द्रें गी आखेया जे ओ दूर-दरेडे ते पछेत्रे इलाकें च जागरुकता कैम्पें दा आयोजन करोआने दे कन्नो-कन्नी उपकरणें गी गुणवत्ता दी जांच बी यकीनी बनान। बुजुर्ग ते दिव्यांग लोकें अगगे पेश पुज्ज सरबन्धी चुनौतियें पर लौ पांदे होई उनें आखेया जे सरकार गी इस खेतर च अजें होर मता किश करना लोडचदा ऐ। उनें आखेया जे इनें लोकें गी सरकार दी लोड ऐ ते सरकार दी बी ए जिम्मेदारी बनदी ऐ जे ओ इंदे घरें कश पुज्जियै इनेंगी लोडचदी मदाद दे दिक्खभाल उपलब्ध कराएं तां जे एब्बी मान-सम्मान कन्नै अपना जीन जी सकन।



Satish Oilseed

मंत्री सतीश शर्मा होरें छम्ब हलके थमां 62 उन्नत करसानें गी तिलहन गी बढ़ावा देने सरबन्धी योजना दे तैहत कृषि विज्ञान केन्द्र आर.एस.पुरा जम्मू दे इक ध्याड़े दे दौरे पर रवाना करवाया। राई-बाई मैहकमे दे बड्डे एहलकार बी इनें करसानें दे कन्नै हे ते इस दौरे दा मकसद करसानें गी भलेया अज्जै-कल्लै दियें तकनीकें ते तिलहन दी खेती च मौजूद उत्तम तौर-तरीकें बारे जानकार बनाना ऐ। इस मौके पर मंत्री होरें खाद्य तेल दे आयात गी घट्ट करने दी जरूरतै पर जोर पाया। जम्मू दे राई-बाई मैहकमे दे डायरेक्टर अनिल गुप्ता होरें इस मौके पर करसानें गी गुजारिश कीती

जे ओ खुम्बें दी काश्त कन्नै बी जुडन कीजे इयां करियै ओ अपनी औंदन च बाद्दा यकीनी बनाई सकदे न।

<><><><><><>

CS Skill Dev.

मुख्य सचिव अटल डुल्लु होरें जम्मू-कश्मीर च कौशल विकास कार्य-योजना दा जायजा लैने आस्तै इक्क उच्चे स्तर दी बैठक लाई। भविष्य लेई तयार कार्यबल पर जोर दिंदे होई- उनें गुणवत्ता-सिखलाई प्रोग्राम- बक्ख-बक्ख विभागें बश्कार तालमेल ते निजी क्षेत्र दी सक्रिय भागीदारी दी लोड पर जोर पाया। उनें मुख्य प्रशिक्षकें- मजबूत पाठ्यक्रम ते समै-बद्ध लक्ष्यें दी लोड बारे गल्ल किती ते आखेया जेह 5 लक्ख नौजवानें गी बी जेगर सही ढंगै कन्नै कौशल बनाया जाग तां जे ए साढे आस्तै बड़ी बड़ी उपलब्धी होग। इस बैठक च ITI पॉलिटैक्निक- रैगुलर कोर्स करोआने आले निजी संस्थानें ते Skill Loan बारे बी गल्लबात होई। डुल्लु होरें सब्भनें संस्थानें गी जम्मू-कश्मीर च समावेशी कौशल विकास गी बढ़ावा देने आस्तै रलियै कम्म करने लेई आखेया।

<><><><><><>

Trains Extended

त्योहारी रूतै दे दौरान यात्रुएं दी बढ़धी मंग गी पूरा करने दे मकसद कन्नै उत्तर रेलवे नै श्री माता वैष्णो देवी कटड़ा ते बनिहाल बश्कार विशेष ट्रेन सेवाएं दा होर विस्तार कीता ऐ। ट्रेन नम्बर - 04688 ते 04687 जिसी शुरुआती तौर पर 19 सितम्बर थमां लेइयै अज्ज 3 अक्तूबर तोड़ी चलाया जाना तय कीता गेदा हा, इसी हून होर चंऊ दिने यानि 7 अक्तूबर तोड़ी जारी रखेया जाग। जम्मू-डिविजन दे रेलवे अधिकारियें आसेया लैते गेदे इस महत्वपूर्ण फैसले दे राएं यात्रियें

गी इक मता सुरक्षित ते सौक्खा विकल्प उपलब्ध होआ ऐ। इस रेल सेवा दे समें ते एदे रुकने आली थाहरें च कोई तबदीली नेंई कीती गई ऐ। यात्री होर मती जानकारी लेई भारतीय रेलवे दी वैबसाईट पर जाई सकदे न जां फही 139 नम्बरै पर राबता करी सकदे न।

<><><><><><>

GST cars

केन्द्र सरकार नै अगली पीढ़ी दे GST सुधारें तैहत मझाटले तबके दे परोआरें गी इक बड़ी राहत दिंदे होई लौहकियें कारें पर टैक्स दी दर गी 28 फीसद कोला घटाइयै 18 फीसद करी दिता ऐ ते मेद ऐ जे इस गैं कन्नै लौहके शैहरें-कस्बें च कारें दी बिक्री च जबरदस्त बाढ़ा दिक्खने गी लब्बोग। GST कौंसल नै 350CC ईजन तक्कर दी समर्थ आले दो पहिया वाहनें पर लग्गने आले टैक्स गी 28 फीसद शा घट्ट करियै 18 फीसद करी दिते दा ऐ। सरकार दा आखना ऐ जे इस गैं कन्नै नां छड़ा उपभोक्ताएं पर पौने आला माली दबा घट्ट होग सगुआ कम्म-रोजगार दे मौके पर पैदा होगन ते अर्थव्यवस्था गी बी बल मिलोग।

<><><><><><>

MKB 11 Years

प्रधानमंत्री नरेन्द्र मोदी हुंदा महावार रेडियो कार्यक्रम “मन की बात” अज्ज अपने 11 बरे पूरे करी गया ऐ। बरे 2014 च अज्जै दे दिन विजयदशमी यानि दशहरे दे मौके आकाशवाणी पर मन की बात दा पहला एपिसोड प्रसारित कीता गया हा। जंदी 28 सितम्बर गी प्रधानमंत्री नरेन्द्र मोदी होरें मन की बात दे 126में एपिसोड दे राएं देशवासियें कन्नै अपने मनै दियां गल्लां सांजियां

कीतियां हियां। मन की बात दा ए कार्यक्रम छड़ा इक प्रसारण गै नेंई सगुआ सांस्कृतिक ते समाजी बदलाव दा इक ऐसा प्रतिक बी बनी गेदा ऐ जेड़ा देशा दे हर कोने तोड़ी अपनी पुज्ज स्थापित करी चुके दा ऐ। पिच्छले 11 बरें दे दौरान “मन की बात” नै प्रधानमंत्री ते देशवासियें बशकार सिद्धे सम्पर्क आले इक महत्वपूर्ण मंच दे तौर पर लगातार सेवा दिती ऐ।



POJK Protests

पाकिस्तान दे नजैज कब्जे आहले जम्मू-कश्मीर च पाकिस्तान बलें ते प्रदर्शनकारियें बशकार झड़प होई- जेदे च घट्टो-घट्ट 10 लोक मारे गे ते तकरीबन 12 बुरी हालत कन्नै जखमी होए। नागरिक समाज गठबंधन दी 38 मंगां हियां- जिसी पूरा करने च पाकिस्तान सरकार नाकाम रेई- जेदे करी एह प्रदर्शन होआ रदा हा। इस अशांति भरे माहौल दे चलदे उच्चे-स्तर दी प्रतिनिधिमंडल बैठक रखी गई जेड़ी इस मसले गी नबेड़ने लेई गल्लबात करोग ते ए क्षेत्र कल लगातार चौथे दिन बंद रेया ऐ। POJK दे खुर्शीद स्टेडियम च मुज्जफराबाद पुलस फाईरिंग च जान मुआने आहलें दे अंतिम संस्कार आस्तै भीड़ जमा होई गेदी ही।



First Snowfall

मौसम विभाग मुजब कश्मीर घाटी दियें उच्चियें धारें सनें मशहूर स्कीई रिजोर्ट गुलमर्ग च अराफात आली चोटी पर बी इस रुतै दी पैहली बर्फबारी होई ऐ ते मेद ऐ जे औने आले दिनें च उच्चियें धारें पर होर मती बर्फबारी होग। आकाशवाणी दे जम्मू संवाददाता मुजब मौसम विभाग नै कल 4 अक्तूबर थमां लेइयै 7 अक्तूबर तोड़ी पच्छिमी हवाएं च खौतल करी समूलचे जम्मू-कश्मीर करी

मौसम खराब रौहने दी भविक्खवाणी कीती ऐ। इस अवधि दौरान उच्चे पहाड़ी इलाकें च बर्फबारी ते दमैयानी दर्जे दी बरखा दे कन्नै जम्मू खिते दे इलाकें च गर्ज-चमक कन्नै बड़ी बारी बरखा बरने ते अंधि-झक्खड़ चलने दे बी असार ना।



RTO Ramban

रामबन दा क्षेत्रीय वाहन दफ्तर जिले च सिड़क सुरक्षा बधाने लेई तेजिया कन्नै कम्म करा रदा ऐ। बक्ख-बक्ख विभागें कन्नै मिलियै रामबन दा RTO सिड़क सुरक्षा लेई केंई जागरुकता प्रोग्रामें दा आयोजन बी करोआ रदा ऐ। एह विभाग फिटनेस आदर्शें गी बी लागू करदा ऐ ते जेड़े वाहन फिट नेंई हुंदे जां फही उन्दे कागज-पत्तर पूरे नेंई हुंदे-उनेंगी जब्त करी लेंदा ऐ। तोंआई मोटर-गड्डियें दा विभाग यानि MVD खास करियै 2 पइया गड्डियें दे नियम-पालन दी समीक्षा करने आस्तै समें-सिर अभियान करोआंदा रौंहदा ऐ। अधिकारियें सब्भनें वाहन चालकें गी हैलमट पाने ते कन्नै गड्डियें दे कागज-पत्तर रखने आस्तै निर्देशित किता तां जे रामबन जिले सिड़क सुरक्षा गी बढ़ावा मिली सकै।



Lemon Farming Udhampur

उधमपुर जिले च निम्बूएं दी रड़ करा रदे 65एं बरे दे इक करसान नौजवानें दा दिल बदा करदे न जे ओ बक्ख-बक्ख सरकारी योजनाएं दा लाह ठोआंदे होई करसानी-बागवानी कन्नै जुड़न। ए करसान निम्बूएं दी व्यवसायिक खेती दी अपनी यात्रा च सजोग देने लेई बागवानी विभाग दा आभार जतांदे ना। PM किसान सम्मान निधि योजना तैहत थोए दे लाह ते सब्सिडियें जनेही

मदाद दे कन्नै ओ बड़ी कामयाबी कन्नै अपने आस्तै रोजी-रूटी दा इक टिकाऊ जरिया स्थापित करने च कामयाब होए दे न।

